

## Rosenberg - Danon

I.

De la joie que desir tant  
D'amors, qui m'a a soi tourné,  
Ne puis leissier que je ne chant  
Puiz que ma dame vient a gré,  
En cui j'ai mis cuer et pensé  
A trestoute ma vie;  
Maiz trop me font anui de lé  
Genz, qui Dieus maleïe!

II.

A touz faiz joie sans talent,  
Neis ciauz que de mon cuer hé:  
Felon, anuieuz, mesdisant,  
Dont deable font tel plenté  
Que trestoute lor pöesté  
Tournent en felenie;  
Ançoiz sunt du mal apensé  
Que l'amour soit jehie.

III.

Petit puet lor guerre valoir  
Quant ma dame voudra amer;  
Et s'ele a talent ne voloir  
De plus loial ami trover  
Qui soit, donc me puis je vanter  
Qu'a haute honeur d'amie  
Ne porroit nus a moi monter  
Pour nule seignourie.

IV.

Se longue atente et bon espoir  
Ne me font joie recouvrer,  
Donc m'ont amours trahi pour voir,  
Car touz jours le m'ont fet cuider;  
Maiz uns vis m'en doit conforter  
Qui mainte ame a trahie,  
Et si sai qu'en desesperer  
A orgueill et folie.

V.

Bele douce dame, merci  
De moi, qui ainc maiz ne fui priz

D'amours! Maiz or m'en est einsi  
Qu'a tous amans m'en aatiz.  
De cuer vous proi volenteïz  
Qu'en vostre compaignie  
M'acueilliez, ainz qu'il m'en soit piz  
Par felenesse envie.

VI.

Dame, mout ai petit servi  
A tel don con je vous ai quis,  
Maiz mes cuers m'a vers vous plevi  
D'estre li pluz loiauz amis  
Del mont, si le serai touz dis,  
Qu'amour ai si saisie  
Que nus n'en a point, ce m'est vis,  
Tant que l'aie [en] partie.

VII.

Odin proi et mant et devis  
Que ceste chançon die  
A ciaus qu'il savra ententiz  
D'amer sanz tricherie.

- letto 588 volte

Credits | Contatti | © Sapienza Università di Roma - Piazzale Aldo Moro 5, 00185 Roma T (+39) 06 49911  
CF 80209930587 PI 02133771002

---

**Source URL:** <https://letteraturaeuropea.let.uniroma1.it/?q=laboratorio/rosenberg-danon>